

AJENDA DE DERT



Avocat Andy Rossi
Studie legal Durnwalder
telefon: 0474/410755
email: andy@ra-durnwalder.it



Bandiera ladina, chi este pa per l'ordenament giuridich talian?

Te duc chisc egn olache i ladins e sie lengaz à troà recognosciment a nivel legislatif, nesciugn se à cruzià en cont del più emportant di simboi de la Ladinia, la bandiera ladina



La senta del Comun General de Fascia con la bandiera de l'Europa, chele taliana e ladina e ence chela de l'Ucraina.

Ai 5 de mè del 2023 noscia bandiera compirà 103 egn. Son ben bonorif me dijarede, ajache no sion amò fora dal invern. Ma canche se trata de dar na spenta per zeche, ge vel se tor per temp.

Acà valch meis zachei che à a cher la costion ladina me aea fat na domana pìutost scempia per saer se l'è possibil sot l'profil legal meter fora la bandiera ladina sun ciasa de comun, apede chela taliana, chela europeana e chela de la Provinzia. Enben, canche è tacà a jir a fon te la costion, me n'è ascort che la responeta no la è dalbon scontada.

L'cajo de la bandiera de la pasc

Tel otober 2004 n Consei de Comun del Molise aea deliberà de meter fora, apede a la bandiera taliana e europeana, chela de la pasc. No i l'aesse mai fat! L. Prefet à subito ordenà de la tor de mez e mingol do l'cajo l'è stat portà ence a la Cambra di deputac con tant de interrogazion parlamentara. Descheche sozet semper tel ciamp del derit, doi l'era le tesi su la costion. Na pruma dijea che la bandiera de la pasc l'è esprescion del art. 11 de la Costituzione, ajache la Talia refuda la vera. Apede chest se dijea che la raprejentà n' messaje universal e che no l'era negun diviet de tacar fora chesta bandiera.

Per la seconda tesi enveze, l'art. 11 de la Costituzione no à nia a che far con chesta bandiera, e aboncont se trata de n' simbol privat. La Presidenza del Consei di Ministres è jita do chesta seconda tesi e tel dar responeta a la costion l'ha dit che no l'è possibil, ajache ti frabicac publici pel esser metù fora demò le bandiere istituzionale, e chest per

via del carater neutral de le istituzions, carater che l'è n' prinzip fundamental de la democrazia.

Dit chest, zachei podessa dir che la bandiera ladina no à nia a che far con la bandiera de la pasc. Chest l'è ben vera, ma se trata de n' cajo che ne dasc l'met de entener cala che l'è la protezion arsegurada al tricolor talian.

La degnità de la bandiera taliana

La Costituzione, do la lege nr 22/1998 e l' regolament de atuazion d.P.R. nr 121/2000 ge garantesc al tricolor talian sia degnità. En particular la normativa disc co e can che se pel meter fora la bandiera taliana sui frabicac publici, e soraldut la disc cale bandiere pel star apede a chela taliana, e ence l' relativ orden de espozision.

Anter duta chesta regolamentazion, nia vegn dit su le bandiere de le comunità de mendranza linguistica e chest eneben che la defendura de le mendranze linguistiche sie anter i prinzipies fundamentai de la Republica taliana.

La bandiera taliana è stravardada ence dal art. 292 del codesc penal che punesc con la reclusion fin a doi egn chi che desprìjea o danejea l' tricolor. Sul pont, cognede saer che, tant la Presidenza del Consei di Ministres che le Prefeture à semper sostegnù che meter fora la bandiera de la pasc sun frabicac publici pel esser na violazion del art. 292 del codesc penal.

Per regularisar la situazion de le bandiere esprescion de mendranze linguistiche amancol doi Regions se à dat da far e le à aproà na lege regionala.

La lege 27/2001 del Friul - Venezia Giulia

Con l'art. 6 de chesta lege regionala l'è stat pervedù che sui frabicac publici di comun olache se troa le popolazion de un di desvalives gropes linguistiche, apede a la bandiera taliana, europeana e chela regionala, sie tacà fora ence chela de la comunità de mendranza de referiment.

La lege 26/2007 de la Region Piemont

Ence l' Piemont se à dat ju per la costion e con l'art. 1 l'ha metù neigher su bianch che sui frabicac publici di Comun olache se troa popolazion che partegn a una de le mendranze linguistiche regionale, pel esser metù fora, apede a la bandiera taliana, europeana e regionala, ence chela de la comunità de referiment.

E la bandiera ladina?

La vera costion l'è entener chi che à la competenza per poder legiferar en cont de la bandiera ladina.

La lege nr 22/1998 che se cruza de la regolazion su la doura de la bandiera de la Republica taliana e de l' Union Europeana, te sie art. 1 la ge dasc l' met a le Region de entervegnir con sia normativa, coche anter l' auter à jà fat la Region Piemont e l' Friul Venezia Giulia.

Donca, speron che per i 5 de mè del 2023 la bandiera ladina, simbol de la mendranza ladina de le val entorn al Sela, possa troar al più prest l'giust recognosciment e fondament normatif per poder la meter fora te duc i frabicac publici de la Ladinia.